

«Il temp da questa taglia è passà»

Ils Giuvens liberals profiteschan dals embrugls enturn il vademecum

CUN MARTIN BLUMENTHAL
HA DISCURRÌ CLAUDIA CADRUVI / ANR

■ **Cun «pli pauc taglia per ils mastergnants» fan ils Giuvens liberals reclama per lur iniziativa cunter la taglia da cultus. In dals capo-iniziants è Martin Blumenthal.**

Avant in onn avais Vos inoltrà l'iniziativa. Da lez temp n'avessan ils Giuvens liberals mettain betg spetgà che l'investg sustegnna in di indirecta-main Vossa mira?

Martin Blumenthal: Nus n'avain inumma betg spetgà ina gronda reacziun da la baselgia. Cura che nus avain lantschè l'iniziativa han ins plitost fatg legher e betg prendì serius nus. Fin che nus avain inoltrà l'iniziativa. A partir da lez mument èsi stà da spetgar reacziuns. Per part essan nus surstads da tschertas reacziuns.

La tenuta da l'investg da Cuira – da betg prender posiziun – è in sustegn indirect da Vossa iniziativa?

Quai na ves'jau betg uschia. A nus na fai betg donn, ma i porta er betg la massa. I sa tracta simplamain dad ina reacziun d'ina persuna che maina ina instituziun.

Ils embrugls cun il vademecum mainan medemamain aua sin il mulin da l'iniziativa.

Na. L'iniziativa ed il vademecum ston



ins contemplar sco duas tematicas. En l'iniziativa vai per ina taglia che n'è ord nossa vista betg pli actuala e ch'ins po stritgar senza pli gronds donns. Il vademecum da la conferenza dals investgs n'ha da far nagut cun l'iniziativa.

Il vademecum less scumandar a las baselgias chantunalas da sa numnar baselgias. E gist las baselgias chantunalas profiteschan da la taglia da cultus.

Sa chapescha. Quests daners van cumplettamain a las basegias chantunalas. Ma ils Giuvens liberals discurren da las finanzas e la conferenza dals investgs discurren davart la dumonda co che questas baselgias chantunalas dastgan sa numnar. Quai è in auter tema.

L'investgieu da Cuira less – sut il pretext dal vademecum – gudagnar da pli influenza sin ils daners da las baselgias chantunalas. Dal cumbat da pussanza tranter l'investg e las baselgias chantunalas profitescha l'iniziativa.

Cun la damonda, tgi che dastga decider davart ils daners, vegn era la giustifiziun da questa taglia messa en dumonda. Nus essan persuadids che bain inqualin vegn uschia a la conclusiun ch'i na dovria betg pli la taglia da cultus per persunas giuridicas.

Il 2014 po il pievel votar davart l'iniziativa. Tge prognosa faschais Vos?

Durant rimnar suttascripziuns avain nus vesì che persunas sut quaranta onns eran en general persuenter. Persunas surtschuncanta avevan ina tenuta pli conservativa e levan mantegnair la taglia perquai ch'igl è gea adina stà uschia. Glied pli veglia va pli stedi a votar. Cunquei hai jau il sentiment ch'i vegn ad esser fitg grev per nus. Jau quintel plitost cun in «na». En diesch onns vessori or auter.

En cas d'in «gea» giess il Corpus Catholicum a frusta. Na faschess quai betg mal il venter a Vos?

Nossa iniziativa porscha ina gronda schanza a las baselgias chantunalas da daventar activas. Ella dat la pussaivladad a questas instituziuns dad ir tar lur clients per ils daners.

Tge clients ha il Corpus Catholicum pia?

Ils clients èn sco tar tut las autras organisaziuns da nonprofit – saja quai il WWF u la Rega – la glied. Tut las organisaziuns da nonprofit ston ir tar il pievel e guardar tge basegns ch'existan. Er en la religiun ston ins eruir tge che la glied vul. Suenter èsi da rimnar daners da quella glied che giuda ils servetschs da questa instituziun.

Vus cartais ch'insatgi dess daners al Corpus Catholicum?

Sa chapescha. Gia ozendi èsi uschia ch'il singul ha la pussaivladad d'extrar da la baselgia. Lura na sto el sco persuna natirala betg pajar taglia da baselgia. Aschia vegniss quai er ad esser en l'avegnir. Las fatschentas avessan la pussaivladad da dar ina contribuziun al Corpus Catholicum – ma i na ston betg.

Pajais Vos sco persuna privata taglia da baselgia?

Jau paj taglia da baselgia e sun comember da la baselgia. Jau sun dentant da l'opiniun ch'i faschess bain a la baselgia, ch'è per il mument in pau dormulenta, d'avair ina tscherta innovaziun. Sco las baselgias libras ch'èn adina stadas sfurzadas dad ir tar lur clients per ils daners. In pau concorrenza faschess bain a las baselgias statalas.

Mintga reformà u catolic paja gia

taglia da baselgia sin plaun communal. I na dess segir nagina fatschenta che pajass anc ina contribuziun ad ina baselgia chantunala.

I dess segir fatschentas che dian: Nus avain nossa fatschenta en questa vischnanca ed essan pronts da contribuir insatge. Empè da finanzia in piazza da giugar pudess ina fatschenta forsa pajar insatge per renovar la baselgia.

La finamira dals Giuvens liberals è da distgargiar l'economia. La gronda part dals mastergnants na paja gea nagina taglia da cultus.

Gea, nus vulain stritgar ina taglia ch'i na dovra betg pli. Nus essan da l'opiniun che nagina fatschenta duai esser obligada da pajar questa taglia. Sch'ins resguarda il svilup economic vesan ins ch'i na daventa betg pli simpel da mantegnair ina fatschenta en il Grischun. Cun stritgar questa taglia pudain nus contribuir in pitschen effect positiv.

L'effect na fa betg grass il purschè. 48 pertschient da las persunas giuridicas na pajan nagina taglia da cultus. 38 pertschient pajan mo 200 fin 400 francs.

Dagut e dagut fan puz. Ins sto entschaiver là nua ch'ins po gidar. Nus avain il sentiment ch'i na dovria ozendi betg pli la taglia da cultus. Era sche l'effect n'è betg uschè grond – ins po far urden e stritgar ella. Il temp da questa taglia è passà.